



舊五代史卷四十九

宋門下侍郎參知政事監修國史薛居正等撰

唐書第二十五

莊宗列傳一 后妃

武皇帝貞簡皇后曹氏莊宗之母也太原人以良家子
嬪于武皇姿質閒麗性謙退而明辨雅爲秦國夫人所
重常從容謂武皇曰妾觀曹姬非常婦人王其厚待之
武皇多內寵乾寧初平燕薊得李匡儔妻張氏姿色絕
代嬖幸無雙時姬侍盈室罕得進御唯太后恩顧不衰
武皇性嚴急左右有過必峻于譴罰無敢言者唯太后

從容救諫卽爲解顏及莊宗載誕體貌奇傑武皇異而
憐之太后益寵貴諸夫人咸出其下后亦恭勤內助左
右稱之武皇薨莊宗嗣晉王位時李克寧李存勳謀變
人情危懼太后召監軍張承業指莊宗謂之曰先人把
臂授公此兒如聞外謀欲孤付託公等但置子母子有
地毋令乞食于沛幸矣承業因誅存勳克寧以清內難
莊宗善音律喜伶人謔浪太后常提耳誨之天祐七年
鎮定求援莊宗促命治兵太后曰子齒漸衰兒但不墜
先人之業爲幸矣何事櫛風沐雨離我晨昏莊宗曰稟
先王遺旨須滅仇讐山東之事機不可失及發太后餞

于汾橋悲不自勝莊宗平定趙魏駐于鄴城每一歲之
內馳駕歸寧者數四民士服其仁孝太后初封晉國夫
人莊宗卽位命宰臣盧損奉冊書上皇太后尊號其年
平定河南西幸洛陽令皇弟存渥皇子繼岌就太原迎
奉莊宗親至懷州迎歸長壽宮太后素與劉太妃善分
訣之後悒然不樂俄聞太妃寢疾尚醫中使問訊結轍
旣而謂莊宗曰吾與太妃恩如伯仲彼經年抱疾但見
吾面差足慰心吾暫至晉陽旬朔與之俱來莊宗曰時
方暑毒山路崎嶇無煩往復可令存渥輩迎侍太妃乃
止及凶問至太后慟哭累旬由是不豫尋崩于長壽宮

同光三年冬十月上諡曰貞簡皇太后葬于壽安陵

太妃劉氏武皇之正室也

案劉太妃傳原本闕佚攷北

夫人常隨軍行至軍機多所宏益先是汴州上源驛有變晉王憤恨欲回軍攻之夫人曰公為國討賊而以杯酒私忿必若攻城即曲在于我不如回師自有朝廷可以論列于是班退天復中周德威為汴軍所敗三軍潰散汴軍乘我晉王危懼與李存信議欲出保雲州夫人曰存信本北方牧羊兒也焉顧成敗王常笑王行瑜棄城失勢被入屠割今復欲效之何也王頃歲避難塞外幾遭陷害賴遇朝廷多事方得復歸今一旦出城便有不測之變焉能遠及晉王止行居數日已散之士復集軍城安定夫人之力也五代會要云同光元年四月冊為皇太妃歐陽史云莊宗即位冊尊曹氏為皇太后而以嫡母劉氏為皇太妃太妃往謝太后太后有慙色太妃曰願吾兒享國無窮使吾獲没于地以從先君幸矣復何言哉莊宗滅梁入洛使人迎太后歸洛居長壽宮而太妃獨留晉陽同

光三年五月太妃薨

魏國夫人陳氏襄州人本昭宗之宮嬪也乾寧二年武

皇奉詔討王行瑜駐軍于渭北昭宗降朱書御札出陳

氏及內妓四人以賜武皇陳氏素知書有才貌武皇深

加寵重及光化之後時事多艱武皇常獨居深念嬪媵

鮮得侍謁唯陳氏得召見陳氏性既靜退不以寵侍自

侈武皇常呼為阿嬌及武皇大漸之際陳氏侍醫藥垂

泣言妾為王執掃除之役十有四年矣王萬一不幸妾

將何託既不能以身為殉願落髮為尼為王讀一藏佛

經以報平昔武皇為之流涕及武皇薨陳氏果落髮持

經法名智願後居于洛陽佛寺莊宗賜號建法大師天

成中明宗幸其院改賜圓惠大師晉天福中卒于太原
追諡光國大師塔以惠寂為名也

莊宗神閔敬皇后劉氏

案劉后傳原本闕佚攷北夢瑣言云莊宗劉皇后魏州成安人

家世寒微太祖攻魏州取成安得后時年五六歲歸晉陽宮為太后侍者教吹笙及弄姿色絕眾聲伎亦所長太后賜莊宗為韓國夫人侍者後誕皇子繼岌寵待日隆他日成安人劉叟詣鄴宮見上稱夫人之父有內臣劉建豐認之即昔日黃鬚丈人后之父也劉氏方與嫡夫人爭寵皆以門族誇尚劉氏恥為寒家白莊宗曰妾去鄉之時妾父死于亂兵是時環尸而哭妾固無父是何田舍翁詐偽及此乃于宮門答之其實后即叟之長女也莊宗好俳優宮中暇日自負著囊藥篋令繼岌相隨以后父劉叟以醫十為業也后方晝眠乃造其臥內自稱劉衙推訪女后大恚答繼岌然為太后不禮後以韓夫人居正無以發明大臣希旨請冊劉氏為皇后議者以后出于寒賤好興利聚財初在鄴宮令人設法禪取所鬻樵蘇果茹亦以皇后為名正位之後凡貢奉先

入後宮惟寫佛經施尼師他無所賜闕下諸軍因乏以至妻子餓殍宰相請出內庫俵給后將出妝具銀盆兩口皇子滿喜等三人令鬻以贍軍一旦作亂亡國滅族與夫褒姒妲己無異也先是莊宗自為俳優名曰李天下雜于塗粉優雜之間時為諸優扑扶擲搭竟為鬪婦思伶之傾玷有國者得不以為前鑒劉后以囊盛金合犀帶四欲于太原造寺為尼沿路復通皇弟存渥同簣而寢明宗聞其穢即令自殺攷歐陽史作裨將袁建豐得后納之晉宮而北夢瑣言作內臣劉建豐亦傳聞之異辭也

淑妃韓氏莊宗正室

案韓淑妃傳原本闕佚攷五代會要云同光二年十二月冊以宰臣

豆盧革韋說為冊使出應天門登路車鹵簿鼓吹前導至于永福門降車入右銀臺門至淑妃宮受冊于內文

武百官立班稱賀

德妃伊氏莊宗次室

案伊德妃傳原本闕佚攷北夢瑣言云莊宗皇帝嫡夫人韓氏後為

淑妃伊氏為德妃又言夫人夏氏後嫁李贊華所謂東丹王即安巴堅長子性酷毒侍婢微過即以刀割火灼

夏氏少長宮掖不忍其凶求離婚歸河陽節度使夏魯奇家後為尼也歐陽史家人傳明宗立悉放莊宗時宮人號國夫人夏氏歸夏魯奇家後嫁李贊華與北夢瑣言微異遼史又以夏氏為莊宗皇后疑誤又案五代會要莊宗朝內職又有昭儀侯氏封汧國夫人昭媛白氏封沂國夫人出使美宣鄧氏封魏國夫人御正楚真張氏封涼國夫人司簿德美周氏封宋國夫人侍真吳氏封延陵郡夫人懿才王氏封太原郡夫人咸一韓氏封昌黎郡夫人瑤芳張氏封清河郡夫人懿德王氏封瑯琊郡夫人宣一馬氏封扶風郡夫人並同光二年十月

明宗昭懿皇后夏氏生秦王從榮及閔帝同光初后以疾崩明宗卽位追封為晉國夫人長興中明宗以秦宋二王位望既隆因思從貴之義乃下制曰故晉國夫人夏氏素推仁德久睦宗親嘗施內助之方不見中興之

盛予當御極子並為王有鵲巢之高無輦衣之貴貞魂永逝懿範常存攷本朝之文沿追冊之制將慰懷于九族冀叶慶于四星宜追冊為皇后兼定懿號既而有司上諡曰昭懿

和武顯皇后曹氏案曹后傳原本闕佚攷五代會要云天成三年正月冊為淑妃長興元年

正月十四日冊為皇后應順元年正月冊為皇太后至清泰三年閏十二月隨末帝崩于後樓晉高祖使人護葬至天福五年正月二十八日追冊曰和武顯皇后

宣憲皇后魏氏案魏后傳原本闕佚據通鑑攷異引唐廢帝實錄云宣憲皇后魏氏鎮州平山

人中和未明宗徇地山東畱戍平山得魏后又云明宗為禪將性闊達不能治生曹后亦疎于畫略生計所資惟宣憲而已五代會要云初封魯國太夫人清泰二年二月月中書門下奏臣聞漢昭帝承祚御歷奉尊諡于雲

陽魏明帝繼體守文思外家于甄館而皆追從徽號附
饗廟庭克隆敬本之文式叶愛親之道臣等又覽國史
竊有見明皇帝母曰昭成皇后竇氏代宗皇帝母曰章
敬太后吳氏始嬪朱邸俄闕幽宮鴻圖既屬于明君尊
號咸追于聖母伏以魯國夫人發祥沙麓貽慶河洲三
后最賢周母允成于天統四妃有子唐宮先啓于帝基
仰惟當宁之情彌軫寒泉之思久虛殷薦慮損皇猷臣
等謹上尊諡曰宣憲皇太后請依昭成皇太后故事擇
日備禮冊命又臣等伏聞先太后舊陵永祔先祠則都
下難崇別廟既追尊諡合翊闕宮按漢朝故事園寢不
在王畿或就陵所便立寢祠今商量上諡後權立同廟
以申告獻配祠之禮請俟他年從之據歐陽史云議建
陵寢而太原石敬瑭反乃于京師河南府東立寢宮
又案五代會要所載明宗時內職德妃王天正成三年
正月冊立長興二年四月進號淑妃應順元年正月十
三日冊為太妃至周廣順元年四月追諡賢妃昭儀王
氏封齊國夫人昭容葛氏封周國夫人昭媛劉氏封趙
國夫人孫氏封楚國夫人御正張氏封曹國夫人司寶
郭氏封魏國夫人司贊于氏封鄭國夫人尚服王氏封
衛國夫人司記崔氏封蔡國夫人司膳翟氏封滕國夫

人司醢吳氏封莒國夫人媿好高氏封渤海郡夫人美
人沈氏封太原郡夫人順御朱氏封吳郡夫人司飾聊
氏封潁川郡夫人司衣劉氏封彭城郡夫人司藥孟氏
封咸陽郡夫人梳篋張氏封清河郡夫人司服王氏封
太原郡夫人櫛篋傅氏封潁川郡夫人知客張氏賜號
尚書故江氏追封濟陽郡夫人以上皆長興三年九月
勅其名號皆中書門下按六典內職仿而行之內人李
氏封隴西縣君崔氏封清河縣君李氏封成紀縣君田
氏封咸陽縣君白氏封南陽縣君並長興四年
二月勅前代內職皆無封君之禮此一
閔帝哀皇后孔氏 案孔后傳原本闕佚據通鑑云孔循
娶循女為從厚妃帝許之庚寅皇子從厚納孔循女為
妃五代會要云初封魯國夫人應順元年四月為末帝
所害晉天福五年正月二十八日追諡為哀皇后
末帝劉皇后應州人也天成中封為沛國夫人清泰初
百官三上表請立中宮遂立為皇后后性强戾末帝甚

憚之故其弟延皓自鳳翔牙校環歲之間歷樞密使出
為鄴都留守皆由后內政之力也及延皓為張令昭所
逐執政請行朝典后力制之止從罷免而已晉高祖入
洛后與末帝俱就燔焉

史臣曰昔三代之興亡雖由于帝王亦繫于妃后故夏
之興也以塗山及其亡也以妹喜商之興也以簡狄及
其亡也以妲己周之興也以文母及其亡也以褒姒觀
夫貞簡之為人也雖未借于前代亦無虧于懿範而劉
后以牝雞之晨皇業斯墜則與夫三代之興亡同矣餘
無進賢輔佐之德又何足以道哉 案五代史無外戚傳
據五代會要武皇長

女瓊華長公主降孟知祥同光二年十二月封第二女
瑤英長公主降張延釗同光三年二月封明宗長女永
寧公主降晉高祖第十三年九月改封齊國公主至清泰
三年四月封至長興四年九月改封齊國公主至清泰
三年二月進封燕國長公主第十四女壽安公主長興
四年六月封第十五女永樂公主長興四年六月封今
攷會要所載亦多舛互如瓊華公主十國春秋諸書作
太祖弟克讓之女會要以為武皇長女此傳聞之異辭
也莊宗女義寧公主降宋廷浩廷浩仕至房州刺史晉
初為汜水關使張從賓之叛戰死見東都事略及宋史
又王禹偁小畜集有宋渥神道碑云母義寧公主天福
中晉祖以嘗事莊宗有舊君之禮每貴主入見聽其不
拜時兵戎方熾經費不充惟公主之家賜予甚厚盡而
復取亦無倦色一日晉祖從容謂貴主曰朕于主家無
所愛惜但朝廷多事府庫甚虛主所知矣今輦轂之下
桂玉為憂可命渥分司西京以豐就養因厚遣之且勅
留司具晨昏伏臘之用至于醢醢率有備焉會要不載
莊宗女幾人是其闕略也惟明宗諸女記之稍詳然攷
薛史趙延壽傳其娶明宗小女為繼室歐陽史亦云耶
律德光為延壽娶從益妹是為永安公主而會要不載

則其闕漏者亦多矣

舊五代史卷四十九

舊五代史卷四十九攷證

唐列傳一貞簡皇后曹氏傳得李匡儔妻張氏 李匡

儔原本避宋諱作李儔今據新唐書藩鎮傳增入

太后餞于汾橋 汾橋原本作渭橋今據通鑑注改正

安巴堅舊作阿保機今改

舊五代史卷四十九攷證

宋門下侍郎參知政事監修國史薛居正等撰

唐書第二十六

宗室 列傳二

克讓武皇之仲弟也少善騎射以勇悍聞咸通中從討
龐勛以功為振武都校乾符中王仙芝陷荆襄朝廷徵
兵克讓率師奉詔賊平以功授金吾將軍畱宿衛初懿
祖歸朝憲宗賜宅于親仁坊自長慶以來相次一人典
衛兵武皇之起雲中殺段文楚朝議罪之命加兵于我
懼將逃歸天子詔巡使王處存夜圍親仁坊捕克讓詰

且兵合克讓與紀綱何相溫安文寬石的歷十餘騎彎
弧躍馬突圍而出官軍數千人追之比至渭橋死者數
百克讓自夏陽掠船而濟歸于鴈門明年武皇昭雪克
讓復入宿衛黃巢犯闕僖宗幸蜀克讓時守潼關爲賊
所敗以部下六七騎伏于南山佛寺夜爲山僧所害克
讓旣死紀綱渾進通冒刃獲免歸于黃巢中和二年冬
武皇入關討賊屯沙苑黃巢遣使米重威齎賂修好因
送渾進通至兼擒送害克讓僧十人武皇燔偽詔還其
使盡誅諸僧爲克讓發哀行服悲慟久之
克修字崇遠武皇從父弟也父德成初爲天寧軍使從

獻祖討龐勛以功授朔州刺史克修少便弓馬從父征
討所至立功武皇節制鴈門以克修爲奉誠軍使從入
關爲前鋒破黃揆于華陰敗尚讓于梁田坡蹙黃巢于
光順門每戰皆捷勇懾諸軍賊平授檢校刑部尙書爲
左營軍使其年十月潞州牙將安居受來乞師請復昭
義軍武皇遣大將賀公雅李筠安金俊等以兵從與孟
方立戰于銅鞮不利武皇乃令克修將兵繼進是月平
潞州斬其刺史李殷銳乃表克修爲昭義節度使光啓
二年九月克修出師山東收復邢洛十一月拔故鎮孟
方立遣將呂臻來援戰于焦岡大敗之擒呂臻俘斬萬

計進拔武安臨洛諸屬縣乘勝進圍邢州方立求援于
鎮州王鎔出師三萬援之克修軍退及李罕之來歸武
皇授以澤州刺史與克修合勢進攻河陽連歲出師以
苦懷孟十月孟方立遣將奚忠信將兵三萬襲我遼州
克修設伏于遼之東山大敗賊軍擒忠信以獻龍紀元
年武皇大舉以伐邢洛及班師因撫封于上黨克修性
儉嗇不事華靡供帳饗膳品數簡陋武皇怒其菲薄笞
而詬之克修慙憤發疾明年三月卒于潞之府第時年
三十一莊宗卽位追贈太師克修子二人長曰嗣弼次
曰嗣肱嗣弼初授澤州刺史歷昭義橫海節度副使改

海州刺史天祐十九年契丹犯燕趙陷涿郡遼史太祖

癸亥圍涿州有白兔緣壘而上是日破其郭嗣弼舉家被俘遷于幕庭

嗣肱少有膽略屢立戰功夾城之役從周德威爲前鋒
時兄嗣弼爲昭義副使與嗣昭守城兄弟內外奮戰忠
力威壯感動三軍潞圍旣解以功授檢校左僕射入爲
三城巡檢知衙內事天祐七年周德威援靈夏党項阻
道音驛不通嗣肱奉命自麟州渡河應接德威與党項
轉戰數十里合德威軍柏鄉之戰嗣肱爲馬步都虞候
明年從莊宗會朱友謙于猗氏改教練使與存審援河
中敗汴軍于胡壁堡獲將龐讓十年與存審屯趙州擊

汴人于觀津時梁祖新屠棗強其將賀德倫急攻蓆縣
率師五萬合勢營于蓆之西嗣肱自下博率騎三百薄
晚與梁之樵芻者相雜日既晡入梁軍營門諸騎相合
大譟弧矢星發虓闕馳突汴人不知所爲營中擾旣暝
斂騎而退是夜梁祖燒營而遁解蓆縣之圍以功特授
蔚州刺史鴈門以北都知兵馬使從平劉守光十二年
改應州刺史累遷澤代二州刺史石嶺以北都知兵馬
使十九年新州刺史王郁叛入契丹嗣肱進兵定媯儒
武等三州授山北都團練使二十年春卒于新州時年
四十五

克恭武皇之諸弟也龍紀中爲決勝軍使大順初潞帥
李克修卒克恭代爲昭義節度使性驕橫不法未閑軍
政潞人素便克修之簡正惡克恭之恣縱又以克修非
罪暴卒人士離心時武皇初定邢洛三州將有事于河
朔大蒐軍實潞州有後院軍兵之雄勁者克恭選其五
百人獻于武皇軍使安居受惜其兵不悅克恭令裨校
李元審安建紀綱馮霸部送太原行次銅鞮縣馮霸劫
衆謀叛殺都將劉杲縣令戴勞謙循山而南北及沁水
有衆三千武皇令李元審將兵擊之與霸戰于沁水不
利元審戰傷收軍于潞五月十五日克恭視元審于孔

目吏劉崇之第是日州將安居受引兵仗攻克恭因風縱火克恭元審並遇害州民推居受爲留後初孟方立之亂居受以澤潞歸于武皇至是孟遷以邢洛納降復任爲牙將居受懼其圖已乃叛殺克恭以結汴人居受遣人名馮霸于沁水霸不受命居受懼將奔歸朝廷至長子爲野人所殺傳首馮霸軍霸乃引軍據潞州自稱留後求援于汴武皇令康君立討之汴將葛從周來援霸九月李存孝急攻潞州汴軍夜遁獲霸等誅之武皇乃以康君立爲昭義節度使

克寧武皇之季弟也初從起雲中爲奉誠軍使赫連鐸之攻黃花城也克寧奉武皇及諸弟登城血戰三日力盡備竭殺賊萬計燕軍之攻蔚州克寧昆仲嬰城拒敵晝夜輟寢食者旬餘後從達靱入關逐黃寇凡征行無不衛從于昆弟之間最推仁孝小心恭謹武皇尤友愛之及鎮太原授遼州刺史累至雲州防禦使乾寧初改忻州刺史從入關討王行瑜充馬步軍都將以功授檢校司徒天祐初授內外都制置管內蕃漢都知兵馬使檢校太保充振武節度使凡軍政皆決于克寧五年正月武皇疾篤克寧等待疾垂泣辭訣克寧曰王萬一不諱後事何屬因召莊宗侍側謂克寧張承業曰亞子累

公等言終棄代將發哀克寧紀綱軍府中外無譁初武
皇獎勵軍戎多畜庶孽衣服禮秩如嫡者六七輩比之
嗣王年齒又長各有部曲朝夕聚謀皆欲爲亂莊宗英
察懼及于禍將嗣位讓克寧曰兒年孤稚未通庶政雖
承遺命恐未能彈壓大事季父勲德俱高衆情推伏且
請制置軍府候兒有立聽季父處分克寧曰亡兄遺命
屬在我兒孰敢異議者兒但嗣世中外之事何憂不辦
視事之日率先拜賀莊宗嗣位軍民政事一切委之權
柄旣重趣向者多附之李存顥者以陰計干克寧曰兄
亡弟及古今舊事季父拜姪理所未安富貴功名當宜

自立天取不與後悔無及克寧曰公毋得不祥之言我
家世立功三代父慈子孝天下知名苟吾兄山河有託
我亦何求公無復言必斬爾首以徇克寧雖慈愛因心
而日爲兇徒惑亂羣兇之妻復以此言干克寧妻孟夫
人說激百端夫人懼事泄及禍屢讓克寧由是愈惑會
克寧因事殺都虞候李存質又請兼領大同節度以蔚
朔爲屬郡又數怒監軍張承業李存璋繇是知其有貳
近臣史敬鎔素與存顥善盡知其事敬鎔告貞簡太后
曰存顥與管內太保陰圖叛亂俟嗣王過其第卽擒之
并太后子母欲送于汴州竊發有日矣莊宗召張承業

李存璋謂曰季父所為如此無猶子之情骨肉不可自相魚肉吾即避路則禍亂不作矣承業曰老夫親承遺託言猶在耳存顯輩欲以太原降賊王乃何路求生不即討除亡無日矣因令吳珙存璋為之備二月二十日會諸將于府第擒存顯克寧于坐莊宗垂泣數之曰兒初以軍府讓季父季父不忍棄先人遺命今已事定復欲以兒子母投畀豺虎季父何忍此心克寧泣對曰蓋讒夫交構吾復何言是日與存顯俱伏法克寧仁而無斷故及于禍

案新唐書宰相世系表國昌有子四人克恭克儉克用克柔是書李嗣昭傳云嗣昭武皇母弟代州刺史克柔之假子也是克柔為武皇母弟新唐書沙陀傳武皇有弟克勤通鑑引紀年錄有兄

克儉而是書俱無傳疑有闕文

史臣曰昔武皇發跡于陰山莊宗肇基于河朔雖奄有天下而享國日淺眷言枝屬空秀棟華固未及推帝堯敦敘之恩廣成王封建之義自克讓而下不獲就魯衛之封懋間平之德也况天橫相繼亦良可悲哉

李存璋謂曰...
 相魚肉吾朝...
 此言猶在耳...
 即討除...
 其性慈聞平之...
 憐婦之恩...
 天下而享國日...
 史臣曰昔...
 舊五代史卷五十

舊五代史卷五十攷證

唐列傳二宗室克讓傳比至渭橋 渭橋歐陽史作滑

橋疑傳刻之訛據通鑑攷異引薛史亦作渭橋今仍其舊

明年武皇昭雪克讓復入宿衛黃巢犯闕僖宗幸蜀克

讓時守潼關為賊所敗 案僖宗幸蜀以前武皇未

嘗昭雪克讓無由復入宿衛出守潼關通鑑攷異嘗

辨其誤今攷新唐書黃巢傳巢攻潼關齊克讓以其

軍戰關外時士饑甚潛燒克讓營克讓走入關疑當

時因齊克讓之名與李克讓同遂致傳聞輾轉失實

耳歐陽史祇據薛史原文不爲辨正今無可復攷姑
附識于此

克修傳是月平潞州斬其刺史李殷銳 案新唐書僖
宗紀中和三年十月李克用陷潞州刺史李殷銳死
之與是書李克修傳同是書武皇紀又作十一月平
潞州紀傳自相矛盾通鑑從克修傳作十月歐陽史
從武皇紀作十一月

天祐十九年契丹犯燕趙陷涿郡 十九年歐陽史作
十一年

克寧傳李存顯者 案歐陽史作養子存顯存實

懋間平之德 間平原本作開平釋其文義當是用漢
時河間獻王東平憲王今改正

舊五代史卷五十攷證

舊五代史卷五十一

宋門下侍郎參知政事監修國史薛居正等撰

唐書第二十七

列傳三 宗室

永王存霸武皇子莊宗第二弟同光三年封莊宗敗為

軍卒所殺

歐陽史云存霸歷昭義天平河中三軍節度使居京師食俸祿而已趙在禮反乃遣存霸

于河中莊宗再幸汜水徙存霸北京留守通鑑云李紹榮欲奔河中就永王存霸從兵稍散存霸亦率眾千人

棄鎮奔晉陽又云存霸至晉陽從兵逃散俱盡存霸削髮僧服謁李彥超願為山僧幸垂庇護軍士爭欲殺之

彥超曰六相公來當奏取進止軍士不聽殺之于府門之碑下

邕王存美武皇子莊宗第三弟同光三年封莊宗敗不

知所終

通鑑云存美以病風偏枯得免居于晉陽

薛王存禮武皇子同光三年封莊宗敗不知所終

申王存渥莊宗第四弟

歐陽史存渥與存霸存紀皆莊宗同母弟

同光三年

封莊宗敗與劉皇后同奔太原為部下所殺

通鑑云存渥至晉陽

李彥超不納走至風谷為其下所殺

睦王存义莊宗第五弟同光三年封

案以下

歷虜州刺

史後以郭崇韜壻為莊宗所殺

北夢瑣言云莊宗異母弟存义以郭崇韜女壻

伏誅先是郭崇韜既誅之後朝野駭惋議論紛然莊宗令闈人察訪外事言存义于諸將坐上訴郭氏之無罪

其言怨望又于妖術人楊千郎家飲酒聚會攘臂而泣

楊千郎者魏州賤民自言得墨子術于婦翁能役使陰物帽下召食物果實之類又捕博必勝人有拳握之物以法必取又說煉丹乾汞易人形破局鏞貴要間神奇

之官至尚書郎賜紫其妻出入宮禁承恩用事皇弟存义常朋淫于其家至是與存义並罹其禍

通王存確莊宗第六弟雅王存紀莊宗第七弟同光三

年封莊宗敗並為霍彥威所殺

梁紀太祖有子延鸞落

弟存矩今宗室傳皆不載

魏王繼岌莊宗子也莊宗即位于魏州以繼岌充北都

留守及以鎮州為北都又命為留守

五代會要三年九月二十三日封為

魏王三年伐蜀以繼岌為都統郭崇韜為招討使十月戊

寅至鳳州武興軍節度使王承捷以鳳興文扶四州降

甲申至故鎮康延孝收興州時偽蜀主王衍率親軍五

萬在利州令步騎親軍三萬逆戰于三泉康延孝李嚴

以勁騎三千犯之蜀軍大敗斬首五千級餘皆奔潰王
衍聞其敗也棄利州奔歸西川斷吉柏津浮梁而去已
丑繼岌至興州偽蜀東川節度使宋光祿以梓潼劍龍
普等州來降武定軍節度使王承肇以洋蓬壁三州符
印降興元節度使王宗威以梁開通渠麟等五州符印
送降階州王承岳納符印秦州節度使王承休棄城而
遁辛丑繼岌過利州戊申至劍州己酉至綿州王衍遣
使上賤乞降丁巳入成都自興師出洛至定蜀計七十
五日走丸之勢前代所無師回至渭南聞莊宗敗師徒
潰散自縊死太平廣記引王氏見聞錄云魏王繼岌伐蜀迴軍在道而有鄴都之變莊宗與劉后

命內臣張漢賓齎急詔所在催魏王歸闕張漢賓乘驛
倍道急行至興元西縣逢魏王宣傳詔旨王以本軍方
討漢州康延孝相次繼來欲候之出山以陳凱歌漢賓
督之有軍謀陳岷比事梁與漢賓熟密問張曰天子改
換且是何人張色莊曰我當面奉宣詔魏王况大軍在
行談何容易陳岷曰久忝知聞故敢諮問兩日來有一
信風新人已卽位矣復何形迹張乃說來時聞李嗣源
過河未知近事岷曰魏王且請盤桓以觀其勢未可前
邁張以莊宗命嚴不敢遷延督繼潼繼嵩繼蟾繼曉並
令進發魏王至渭南遇害矣

莊宗子同光三年拜光祿大夫檢校司徒未封莊宗敗
並不知所終清異錄唐福慶公主下降孟知祥長興四
年明宗晏駕唐室亂莊宗諸兒削髮爲苾
芻間道走蜀時知祥新稱帝
爲公主厚待猶子賜予千計

從審明宗長子性忠勇沈厚摧堅陷陣人罕偕焉從莊
宗于河上累有戰功莊宗器賞之用爲金槍指揮使明

宗在魏府爲軍士所逼莊宗詔從審曰爾父子國有大
功忠孝之心朕自明信今爲亂兵所劫爾宜自去宣朕
旨無令有疑從審行至中途爲元行欽所制復與歸洛
下莊宗改其名爲繼璟以爲己子命再往從審固執不
行願死于御前以明丹赤從莊宗赴汴州明宗之親舊
多策馬而去左右或勸從審令自脫終無行意尋爲元
行欽所殺天成初贈太保

秦王從榮明宗第二子也明宗踐阼天成初授鄴都留
守天雄軍節度使三年移北京畱守充河東節度使四
年入爲河南尹一日明宗謂安重誨曰近聞從榮左右

有詐宣朕旨令勿接儒生儒生多懦恐鈍志相染朕方
知之頗駭其事余比以從榮方幼出臨大藩故選儒雅
賴其裨佐今聞此姦儉之言豈朕之所望也鞠其言者
將戮之重誨曰若遽行刑又慮賓從難處且望嚴誠遂
止從榮爲詩與從事高輦等更相唱和自謂章句獨步
于一時有詩千餘首號曰紫府集長輿中以本官充天
下兵馬大元帥從榮乃請以嚴衛捧聖步騎兩指揮爲
秦府衙兵每入朝以數百騎從行出則張弓挾矢馳騁
盈巷旣受元帥之命卽令其府屬僚佐及四方遊士各
試檄淮南書一道陳已將廓清宇內之意初言事者請

為親王置師傅明宗顧問近臣執政以從榮名勢既隆不敢忤旨即奏云王官宜委從榮乃奏刑部侍郎劉贊為王傅又奏翰林學士崔悅為元帥府判官明宗曰學士代予詔令不可擬議從榮不悅退謂左右曰既付以元帥之任而阻予請僚佐又未諭制旨也復奏刑部侍郎任贊從之宋史趙上交傳秦王從榮開府兼判軍衛以上交為虞部員外郎充六軍諸衛推官李澣張沆魚崇遠皆白衣在秦府悉與上交友善累遷司封郎中充判官從榮素豪邁不遵禮法好昵羣小上交從容言曰王位尊嚴當修令德以慰民望王忍為此獨不見恭世子戾太子之事乎從榮怒出之歷涇秦二鎮節度判官從榮及禍僚後舉兵犯宮室敗死廢為庶屬皆坐斥上交由是知名人通鑑明宗紀云己丑大漸秦王從榮入問疾帝俛首不能舉王淑妃曰從榮在此帝不應從榮出聞宮中

皆哭從榮意帝已殂明日稱疾不入是夕帝實小愈而從榮不知從榮自知不為時論所與恐不得為嗣與其黨謀欲以兵入侍先制權臣王辰從榮自河南府常服將步騎千人陳于天津橋孟漢瓊被甲乘馬召馬軍都指揮使朱洪實使將五百騎討從榮從榮方據胡牀坐橋上遣左右召康義誠端門已閉叩左掖門從門隙窺之見朱洪實引騎兵北來走白從榮從榮大驚命取鐵掩心環之坐調弓矢俄而騎兵大至從榮走歸府僚佐皆竄匿牙兵掠嘉善坊潰去從榮與妃劉氏匿牀下皇城使安從益就斬之以其首獻丙申追廢從榮為庶人五代會要云清泰元年葬以公禮五代史補秦王從榮明宗之愛子好為詩判河南府辟高輦為推官輦尤能為詩賓主相遇甚歡自是出入門下者當時名士有若張杭高文蔚何仲舉之徒莫不分庭抗禮更唱迭和時干戈之後武夫用事賄從榮所為皆不悅于是康知訓等竊議曰秦王好文交遊者多詞客此子若一旦南面則我等轉死溝壑不如早圖之高輦知其謀因勸秦王托疾此輩須來問候請大王伏壯士出其不意皆斬之庶幾免禍矣從榮曰至尊在上一旦如此得無危乎輦曰子弄父兵罪當答爾不然則悔無及矣從榮猶豫

不決未幾及禍高輦棄市初從榮之敗也高輦竄于民
家且落髮爲僧旣擒獲知訓以其毀形難認復使巾幘
著緋驗其真僞然後用刑輦神色自若厲聲曰朱衣纔脫白刃難逃觀者笑之
從璨明宗諸子性剛直好客疏財意豁如也天成中爲
右衛大將軍時安重誨方秉事權從璨亦不之屈重誨
嘗以此忌之明宗幸汴留從璨爲大內皇城使一日召
賓友于會節園酒酣之後戲登于御榻安重誨奏請誅
之詔曰皇城使從璨朕巡幸汴州使警大內乃全乖委
任但恣遨遊于予行從之園頻恣歌歡之會仍施峻法
顯辱平人致彼喧譁達于聞聽方當立法固不黨親宜
貶授房州司戶參軍仍令盡命長興中重誨之得罪也

命復舊官仍贈太保

許王從益明宗之幼子也宮嬪所生明宗命王淑妃母
之嘗謂左右曰惟此兒生于皇宮故尤所鍾愛長興末
封許王晉高祖卽位以皇后卽其姊也乃養從益于宮
中晉天福中以從益爲二王後改封郇國公食邑三千
戶其後與母歸洛陽及開運末契丹主至汴以從益遙
領曹州節度使復封許王與王妃尋歸西京會契丹主
死其汴州節度使蕭翰謀歸北地慮中原無主軍民大
亂則已亦不得按轡徐歸矣乃詐稱契丹主命遣人迎
從益于洛陽令知南朝軍國事從益與王妃逃于徽陵

以避之使者至不得已而赴焉從益于崇元殿見羣官
蕭翰率蕃首列拜于殿上羣官趨拜于殿下乃偽署王
松為左丞相趙上交為右丞相李式翟光鄴為樞密使
王景崇為宣徽使餘官各有署置又以北來燕將劉祚
為權侍衛使充在京巡檢翰北歸從益餞于北郊及漢
高祖將離太原從益召高行周武行德欲拒漢高祖行
周等不從且奏其事漢高祖怒車駕將至闕從益與王
妃俱賜死于私第時年十七時人哀之五代史闕文漢高祖自太原起軍建號至洛陽命郭從義先入京師受密旨殺王淑妃與許王從益淑妃臨刑號泣曰吾家子母何罪吾既為契丹所立非敢與人爭國何不且留吾兒每年寒食使持一盂飯灑明宗陵寢聞者無不泣下

重吉末帝長子為控鶴都指揮使閔帝嗣位出為亳州

團練使末帝兵起為閔帝所害通鑑云詔遣殿直楚匡

宋州又云遣楚匡祚殺李重吉于清泰元年詔贈太尉

仍令宋州選隙地置廟明宗紀閔帝有子重哲授銀青光祿大夫檢校工部尚書歐陽

史家人傳不載

雍王重美末帝第二子清泰三年封晉兵入與末帝俱

自焚死通鑑云洛陽自聞兵敗眾心大震居人四出逃竄山谷門者請禁之雍王重美曰國家多難未

能為百姓主徒增惡名耳不若聽其自便事寧自還乃

出令任從所適眾心差安又云皇后積薪欲燒宮室重美諫曰新天子至必不露居他日重

勞民力死而遺怨將安用之乃止史臣曰繼岌以童駮之歲當統帥之任雖功成于劍外

尋求死于涓濱蓋運盡天亡非孺子之咎也從審感厚
遇之恩無苟免之意死于君側得不謂之忠乎從榮以
狂躁之謀賈覆亡之禍謂爲大逆則近厚誣從璨爲權
臣所忌從益爲強敵所脅俱不得其死亦良可傷哉重
美聽洛民之奔亡止母后之燔爇身雖燼于紅燄言則
耀乎青編童年若斯可謂賢矣

舊五代史卷五十一

舊五代史卷五十一攷證

唐列傳三宗室薛王存禮傳武皇子 案是書不言存

禮爲武皇第幾子據五代會要太祖第二子存美第

三子存霸第四子存禮第五子存渥第六子存乂第

七子存確第八子存紀與是書所敘微有同異

魏王繼岌傳莊宗子也 案莊宗紀稱繼岌爲第三子

然莊宗長子次子之名是書及五代會要俱不載

從璨傳從璨明宗諸子 案五代會要以從璨爲明宗

第四子冊府元龜作諸子與明宗紀同今仍其舊意

許王從益傳從益召高行周武行德欲拒漢高祖 案

是書但載從益拒漢事攷宋史趙上交傳云漢祖將
至從益遣上交馳表獻款蓋獻款乃淑妃從益本意
也歐陽史兩存之其事始備分會要以爲樂爲即宗
然其宗與于定于之各異書又正分會要則不備
王繼安與宗于也 案其宗與繼安爲宗二午
于于計第第八于書與于書而於於亦同異
三于計第第六于書與于書而於於亦同異
斷爲左皇宗與于書正分會要亦第廿二午計美策
與收書二宗與于書正分會要亦第廿二午計美策
案其書不言其

舊五代史卷五十一攷證

舊五代史卷五十一

宋門下侍郎參知政事監修國史薛居正等撰

唐書第二十八

列傳四

李嗣昭字益光武皇母弟代州刺史克柔之假子也小

字進通不知族姓所出

歐陽史云本姓韓氏汾州太谷縣民家子

少事克柔

頗謹愿雖形貌眇小而精悍有膽畧沉毅不羣初嗜酒
好樂武皇微伸儆戒乃終身不飲少從征伐精練軍機
乾寧初王珂王珙爭帥河中珙引陝州之軍攻珂珂求
救于武皇乃命嗣昭將兵援之敗珙軍于猗氏獲賊將

李璠等四年改衙內都將復援河中敗汴軍于胡壁堡擒汴將滑禮以功加檢校僕射及王珂請婚武皇武皇以女妻之珂赴禮于太原以嗣昭權典河中留後事李罕之之襲我潞州也嗣昭率師攻潞州與汴將丁會戰于含口俘獲三千執其將蔡延恭代李君慶爲蕃漢馬步行營都將進攻潞州遣李存質李嗣本以兵扼天井關汴將澤州刺史劉吧棄城而遁乃以李存璋爲刺史梁祖聞嗣昭之師大至召葛從周謂曰并人若在高平當圍而取之先須野戰勿以潞州爲敵及聞嗣昭軍韓店梁祖曰進通扼八議路此賊決于我鬪公等臨事制

機勿落姦便賀德倫閉壁不出嗣昭日以鐵騎環城汴人不敢芻牧援路斷絕八月德倫張歸厚棄城遁去我復取潞州光化三年汴人攻滄州劉仁恭求救遣嗣昭出師邢洛以應之嗣昭遇汴軍于沙河擊敗之獲其將胡禮進攻洛州下之獲其郡將朱紹宗九月梁祖自率軍三萬至臨洛葛從周設伏于青山口嗣昭聞梁祖至斂軍而退從周伏兵發爲其所敗偏將王郃郎楊師悅等被擒十月汴人大寇鎮定王郃告急于武皇乃遣嗣昭出師下太行擊懷孟汴將侯信守河陽不意嗣昭之師至旣無守備驅市人登城嗣昭攻其北門破其外垣

俄而汴將闔寶救軍至乃退天復元年河中王珂爲汴人所擄河中晉絳諸郡皆陷四月汾州刺史李瑋謀叛納款于汴嗣昭討之三日而拔斬瑋是月汴人初得蒲絳乃大舉諸道之師來逼太原汴將葛從周陷承天軍氏叔琮營洞渦驛太原四面汴軍雲合武皇憂迫計無從出嗣昭朝夕選精騎分出諸門掩擊汴營左俘右斬或燔或擊汴軍疲于奔命又屬霖雨軍多足腫腹疾糧運不繼五月氏叔琮引退嗣昭以精騎追之汴軍委棄輜重兵仗萬計六月嗣昭出師陰地攻慈隰降其刺史唐禮張瓌是時天子在鳳翔汴人攻圍有密詔徵兵十

一月嗣昭出師晉絳屯吉上堡遇汴將王友通于平陽一戰擒之明年正月嗣昭進兵蒲縣十八日汴將朱友寧氏叔琮將兵十萬來拒二十八日梁祖自率大軍至平陽嗣昭之師大恐三月十一日有白虹貫周德威之營候者云不利宜班師翼日氏叔琮犯德威之營汴軍十餘萬列陣四合德威嗣昭血戰解之乃保軍而退汴軍因乘之時諸將潰散無復部伍德威引騎軍循西山而遁朱友寧乘勝陷慈隰汾等州武皇聞其敗也遣李存信率牙兵至清源應接復爲汴軍所擊汴軍營于晉祠嗣昭德威收合餘衆登城拒守汴人治攻具于西北

隅四面營柵相望時鎮州河中皆爲梁有孤城無援師
旅敗亡武皇晝夜登城憂不遑食召諸將欲出保雲州
嗣昭曰主勿爲此謀兒等苟存必能城守李存信曰事
勢危急不如且入北蕃別圖進取朱溫兵師百萬天下
無敵關東河北受他指揮今獨守危城兵亡地蹙儻彼
築室反耕環塹深固則亡無日矣武皇將從之嗣昭亟
爭不可猶豫未決賴劉太妃極言于內武皇且止數日
亡散之衆復集嗣昭晝夜分兵四出斬將搴旗汴軍保
守不暇二十一日朱友寧燒營退去嗣昭追擊復收汾
慈隰等州五月雲州都將王敬暉據城叛振武石善友

亦爲部將契苾讓所逐嗣昭皆討平之天祐三年汴人
攻滄景劉仁恭遣使求援十一月嗣昭合燕軍三萬進
攻潞州降丁會武皇乃以嗣昭爲昭義節度使始嗣昭
未到之前上黨有占者見一人家舍上常有氣如車蓋
視之但一貧媪而已占者謂媪有子乎曰有見爲軍士
出戍于外占者心異之以爲其子將來有土地之兆也
未幾丁會旣降嗣昭領兵入潞以媪家四面空缺乃駐
于是舍丁會旣歸太原武皇遣使命嗣昭爲帥乃自媪
舍而入理所其氣尋息聞者異之四年六月汴將李思
安將兵十萬攻潞州乃築夾城深溝高壘內外重複飛

走路絕嗣昭撫循士衆登城拒守梁祖馳書說誘百端
嗣昭焚其僞詔斬其使者城中固守經年軍民乏絕含
鹽炭自生以濟貧民嗣昭嘗享諸將登城張樂賊矢中
嗣昭足密拔之坐客不之覺酣飲如故以安衆心五年
五月莊宗敗汴軍破夾城嗣昭知武皇棄世哀慟幾絕
時大兵攻圍歷年城中士民飢死大半鄜里蕭條嗣昭
緩法寬租勸農務穡一二年間軍城完集三面鄰于敵
境寇鈔縱橫設法枝梧邊鄙不聳胡柳之戰周德威戰
沒師無行列至晚方集汴人四五萬登無石山我軍懼
形于色或請收軍保營詰旦復戰嗣昭曰賊無營壘去

臨濮地遠日已晡晚皆有歸心但以精騎逗撓無令返
旆晡後追擊破之必矣我若收軍拔寨賊人入臨濮俟
彼整齊復來卽勝負未決莊宗曰非兄言幾敗吾事軍
校王建及又陳方略嗣昭與建及分兵于土山南北爲
犄角汴軍懼下山因縱軍擊之俘斬三萬級由是莊宗
之軍復振十六年嗣昭代周德威權幽州軍府事九月
以李紹宏代嗣昭出薊門百姓號泣請留截鞍惜別嗣
昭夜遁而歸十七年六月嗣昭自德勝歸藩莊宗帳餞
于戚城莊宗酒酣泣而言曰河朔生靈十年饋輓引領
鶴望俟破汴軍今兵賦不充寇孽猶在坐食軍賦有愧

蒸民嗣昭曰臣忝急難之地每一念此寢不安席大王且持重謹守惠養士民臣歸本藩簡料兵賦歲末春首卽舉衆復來莊宗離席拜送如家人禮是月汴將劉鄩攻同州朱友謙告急嗣昭與李存審援之九月破汴軍于馮翊乃班師十九年莊宗親征張文禮于鎮州冬契丹三十萬奄至嗣昭從莊宗擊之敵騎圍之數十重良久不解嗣昭號泣赴之引三百騎橫擊重圍馳突出沒者數十合契丹退翼莊宗而還是時閻寶爲鎮人所敗退保趙州莊宗命嗣昭代寶攻真定七月二十四日王處球之兵出自九門嗣昭設伏于故營賊至伏發擊之

殆盡餘三人匿于墻墟間嗣昭環馬而射之爲賊矢中腦嗣昭箠中矢盡拔賊矢于腦射賊一發而殪之嗣昭日暮還營所傷血流不止是夜卒嗣昭節制澤潞官自司徒太保至侍中中書令莊宗卽位贈太師隴西郡王長興中詔配饗莊宗廟庭嗣昭有子七人長曰繼儔澤州刺史次繼韜繼忠繼能繼襲繼遠皆夫人楊氏所生楊氏治家善積聚設法販鬻致家財百萬

繼韜小字畱得少驕獒無賴嗣昭旣卒莊宗詔諸子扶喪歸太原襄事諸子違詔以父牙兵數千擁喪歸潞莊宗令李存渥馳騎追諭兄弟俱忿欲害存渥存渥遁而

獲免繼韜兄繼儔嗣昭長嫡也當襲父爵然柔而不武
方在苦廬繼韜詐令三軍劫已爲留後囚繼儔于別室
以事奏聞莊宗不得已命爲安義軍兵馬留後時軍前
糧餉不充租庸計度請潞州轉木五萬貯于相州繼韜
辭以經費不足請轉三萬有幕客魏琢牙將申蒙者因
入奏公事每摭陰事報繼韜云朝廷無人終爲河南吞
噬止遲速間耳由是陰謀叛計內官張居翰時爲昭義
監軍莊宗將卽位詔赴鄴都潞州節度判官任圜時在
鎮州亦奉詔赴鄴魏琢申蒙謂繼韜曰國家急召此二
人情可知矣弟繼遠年十五六謂繼韜曰兄有家財百

萬倉儲十年宜自爲謀莫受人所制繼韜曰定哥以爲
何如曰申蒙之言是也河北不勝河南不如與大梁通
盟國家方事之殷焉能討我無如此算乃令繼遠將百
餘騎詐云于晉絳擒生遂至汴梁主見之喜因令董璋
將兵應接營于潞州之南加繼韜同平章事改昭義軍
爲匡義軍繼韜令其愛子二人入質于汴及莊宗平河
南繼韜惶恐計無所出將脫身于契丹會有詔赦之乃
齎銀數十萬兩隨其母楊氏詣闕冀以賂免將行其弟
繼遠曰兄往與不往利害一也以反爲名何面更見天
下不如深溝峻壁坐食積粟尙可苟延歲月往則亡無

日矣或曰君先世有大功于國主上季父也宏農夫人無恙保獲萬全及繼韜至厚賂宦官伶人言事者翕然稱留後本無惡意姦人惑之故也嗣昭親賢不可無嗣楊夫人亦于宮中哀祈劉皇后后每于莊宗前泣言先人之功以動聖情由是原之在京月餘屢從畋遊寵待如故李存渥深訶詆之繼韜心不自安復賂伶闈求歸本鎮莊宗不聽繼韜潛令紀綱書諭繼遠欲軍城更變望天子遣已安撫事泄斬于天津橋南二子齠年質于汴莊宗收城得之撫其背曰爾幼如是猶知能佐父造反長復何爲至是亦誅乃遣使往潞州斬繼遠函首赴

闕命繼儔權知軍州事繼達充軍城巡檢未幾詔繼儔赴闕時繼儔以繼韜所畜婢僕玩好之類悉爲已有每日料選算校不時上路繼達怒謂人曰吾仲兄被罪父子誅死大兄不仁略無動懷而便烝淫妻妾詰責貨財慙恥見人生不如死繼達服縗麻引數百騎坐于戟門呼曰爲我反乎卽令人斬繼儔首投于戟門之內副使李繼珂聞其亂也幕市人千餘攻于城門繼達登城樓知事不濟啓子城東門至其第盡殺其孥得百餘騎出潞城門將奔契丹行不十里麾下奔潰自剄于路隅天成初繼能爲相州刺史母楊氏卒于太原繼能繼襲奔

喪行服繼能答掠母主藏婢責金銀數因答至死家人
告變言聚甲爲亂繼能繼襲皆伏誅嗣昭諸子自相屠
害幾于湓盡惟繼忠一人僅保其首領焉
裴約潞州之舊將也初事李嗣昭爲親信及繼韜之叛
約方戍潞州因召民泣而諭之曰余事故使已餘二紀
每見分財享士志在平讎不幸薨歿今郎君父喪未葬
卽背君親余可俾刃自殺不能送死與人衆皆感泣繼
而梁以董璋爲澤州刺史率衆攻城約拒久之告急于
莊宗莊宗知其忠懇謂諸將曰朕于繼韜何薄于裴約
何厚裴約能分逆順不附賊黨先兄一何不幸生此鴟

梟乃顧李紹斌曰爾識機便爲我取裴約來朕不藉澤
州彈丸之地卽遣紹斌率五千騎以赴之紹斌自遼州
進軍未至城已陷約被害時同光元年六月也帝聞之
嗟痛不已

李嗣本鴈門人本姓張父準銅冶鎮將嗣本少事武皇
爲帳中紀綱漸立戰功得補軍校乾寧中從征李匡儔
爲前鋒與燕人戰得居庸關以功爲義兒軍使因賜姓
名從討王行瑜授檢校刑部尙書改威遠寧塞等軍使
五年討羅宏信于魏州嗣本爲前鋒師還改馬軍都將
從李嗣昭討王暉于雲州論功加檢校司空汴將李思

安之圍潞州也從周德威軍于余吾嗣本率騎軍日與
汴人轉鬪前後獻俘千計遷代州刺史六年從攻晉絳
爲蕃漢副都校及武皇喪事有日嗣本監護其事改雲
中防禦使雲蔚應朔等州都知兵馬使加特進檢校太
保九年周德威討劉守光嗣本率代北諸軍生熟吐渾
收山後八軍得納降軍使盧文進武州刺史高行珪以
獻幽州平論功授振武節度使號威信可汗十二年莊
宗定魏博劉鄩據莘縣命嗣本入太原巡守都城十三
年從破劉鄩于故元城收洛磁衛三郡六月還鎮振武
八月契丹安巴堅領塞犯邊其衆三十萬攻振武嗣本

嬰城拒戰者累日契丹爲火車地道晝夜急攻城中兵
少禦備罄竭城陷嗣本舉族入契丹有子八人四人陷
于幕庭嗣本性剛烈有節義善戰多謀然治郡民頗傷
苛急人以此少之也

李嗣恩本姓駱

歐陽史嗣恩本吐谷渾部人

年十五能騎射侍武皇

于振武及鎮太原補鐵林軍小校從征王行瑜奉表獻
捷加檢校散騎常侍漸轉突陣指揮使賜姓名天祐四
年逐康懷英于河西解汾州之圍加檢校司空充左廂
馬軍都將戰王景仁有功加檢校司徒救河中府與梁
人接戰應弦斃者甚衆而稍中其口及退莊宗親視其

傷深加慰勉轉內衙馬步都將遼州刺史十二年從莊宗入魏擊劉鄩有功轉天雄軍都指揮使劉鄩之北趨樂平也嗣恩襲之倍程先入晉陽時城中無備得嗣恩兵至人百其勇鄩聞其先過乃遁莘之戰以功轉代州刺史充石嶺關以北都知兵馬使稍遷振武節度使十五年追赴行在卒于太原天成初明宗敦念舊勲詔贈太尉有子二人長曰武八騎射推于軍中嘗有時輩臂飢鷹矜其搏擊武八持鳴鏑一隻賭其狩獲暮乃多之戰契丹于新州歿焉幼曰從郎累爲行軍司馬

史臣曰嗣昭以精悍勤勞佐經綸之業終沒王事得以爲忠然其後嗣皆不免于刑戮者何也蓋貨殖無窮多財累愚故也抑苟能以清白遺子孫安有斯禍哉裴約以偏裨而効忠烈尤可貴也嗣本嗣恩皆以中涓之効參再造之功故可附于茲也

參再讀文內姑何謂于其也
以歸縣而終忠烈大
相果愚然也
舊五代史卷五十二攷證
唐列傳四李嗣昭傳初嗜酒
吳縝纂誤云喜卽嗜也疑贖喜字
武皇乃以嗣昭爲昭義節度使
克用以其子嗣昭爲留後攷嗣昭本克柔養子舊唐
書以爲武皇子殊誤
嗣昭有子七人長曰繼儔澤州刺史次繼韜繼忠繼能
繼襲繼遠
案嗣昭有子七人此傳僅載其六歐陽
史仍薛史之舊據繼韜附傳有弟繼達合數之恰得
七人也

舊五代史卷五十二攷證

唐列傳四李嗣昭傳初嗜酒 案歐陽史作初喜嗜酒

吳縝纂誤云喜卽嗜也疑贖喜字

武皇乃以嗣昭爲昭義節度使 案舊唐書作太原李

克用以其子嗣昭爲留後攷嗣昭本克柔養子舊唐

書以爲武皇子殊誤

嗣昭有子七人長曰繼儔澤州刺史次繼韜繼忠繼能

繼襲繼遠 案嗣昭有子七人此傳僅載其六歐陽

史仍薛史之舊據繼韜附傳有弟繼達合數之恰得

七人也

李繼韜傳命爲安義軍兵馬留後 案通鑑注云後唐
改昭義爲安義蓋爲嗣昭避諱也歐陽史仍作昭義
裴約傳卽遣紹斌率五千騎以赴之 李紹斌歐陽史
作李存審攷是書莊宗紀亦作紹斌疑歐陽史誤
李嗣恩傳戰契丹于新州歿焉 案遼史太祖紀二年
三月合戰于新州東殺李嗣本之子武八攷武八本
嗣恩子而遼史以爲嗣本子蓋傳聞之誤
安巴堅舊作阿保機今改

舊五代史卷五十二攷證

舊五代史卷五十三

宋門下侍郎參知政事監修國史薛居正等撰

唐書第二十九

列傳五

李存信本姓張父君政回鶻部人也大中初隨懷化郡
王李思忠內附因家雲中之合羅川存信通黠多數會
四夷語別六蕃書善戰識兵勢初爲獻祖親信從武皇
入關平賊始補軍職賜姓名大順中累遷至馬步都校
與李存孝擊張濬軍于平陽時存孝驍勇冠絕軍中皆
下之惟存信與爭功由是相惡有同水火及平定潞州

存孝以功望領節度旣而康君立授旄鉞存孝怒大剽
潞民燒邑屋言發流涕疑存信擯已故也明年存孝得
邢洛武皇與之節鉞存孝慮存信離間欲立大功以勝
之屢請兵于武皇請兼并鎮冀存信間之不時許大順
二年武皇大舉略地山東以存信爲蕃漢馬步都校存
孝聞之怒武皇令存質代之存孝乃謀叛旣誅以存信
爲蕃漢都校從討李匡儔降赫連鐸白義誠以功授檢
校僕射從入關討王行瑜加檢校司空領郴州刺史乾
寧三年充鄆乞師于武皇武皇遣存信營于莘縣與朱
瑄合勢以抗梁人梁祖患之遣使謀羅宏信曰河東志

在吞食河朔迴軍之日貴道堪憂而存信戢兵無法稍
侵魏之芻牧宏信怒翻然結于梁祖乃出兵三萬以攻
存信存信斂衆而退爲魏人所薄委棄輜重退保洛州
軍士喪失者十二三武皇怒大出師攻魏博屠陷諸邑
五月存信攻于洹水汴將葛從周氏叔琮來援魏人存
信與鐵林都將落落遇汴人于洹水南汴人爲陷馬坎
以待之存信戰敗落落被擒九月存信敗葛從周于宗
城乘勝至魏州之北門明年聞兗鄆皆陷乃班師八月
從討劉仁恭師次安塞爲燕軍所敗武皇怒謂存信曰
昨日吾醉不悟賊至公不辨耶古人三敗公始二矣存

信懼泥首謝罪幾至不測自光化已後存信多稱病武皇以兵柄授李嗣昭以存信爲右校而已天復二年十月以疾卒于晉陽時年四十一

李存孝本姓安名敬思

新唐書存孝飛狐人

少于俘囚中得隸紀

綱給事帳中及壯便騎射驍勇冠絕常將騎爲先鋒未嘗挫敗從武皇救陳許逐黃寇及遇難上源每戰無不尅捷張濬之加兵于太原也潞州小校馮霸殺其帥李克恭以城叛時汴將朱崇節入潞州梁祖令張全義攻澤州李罕之告急于武皇武皇遣存孝率騎五千援之初汴人攻澤州呼罕之曰相公常恃太原輕絕大國今

張相公圍太原葛司空已入潞府旬日之內沙陀無穴自處相公何路求生耶存孝聞其言不遜選精騎五百繞汴營呼曰我沙陀求穴者俟爾肉饌軍可令肥者出鬪汴將有鄧季筠者亦以驍勇聞乃引軍出戰存孝激勵部衆舞稍先登一戰敗之獲馬千匹生擒季筠于軍中是夜汴將李讜收軍而遁存孝追擊至馬牢山俘斬萬計遂退攻潞州時朝廷命京兆尹孫揆爲昭義節度使令供奉官韓歸範送旌節至平陽揆乃仗節之潞梁祖與揆牙兵三千爲紀綱時揆爲張濬副招討所部萬人八月自晉絳踰刀黃嶺趨上黨存孝引三百騎伏于

長子西崖間揆褒衣大蓋擁衆而行俟其軍前後不屬存孝出騎橫擊之擒揆與歸範及俘囚五百獻于太原存孝乃急攻潞州九月葛從周棄城夜遁存孝收城武皇乃表康君立爲潞帥存孝怒不食者累日十月存孝引收潞州之師圍張濬于平陽營于趙城華州韓建遣壯士三百夜犯其營存孝謀知設伏以擊之盡殪進壓晉州西門獲賊三千自是閉壁不出存孝引軍攻絳州十一月刺史張行恭棄城而去張濬韓建亦由含口而遁存孝收晉絳以功授汾州刺史大順二年三月邢州節度使安知建叛入汴軍武皇令存孝定邢洛因授之

節鉞時幽州李匡威與鎮州王鎔屢弱中山將中分其疆土定州王處存求援于武皇武皇命存孝侵鎮趙之南鄙又令李存信李存審率師出井陘以會之并軍攻臨城柏鄉李匡威救至且議旋師李存信與存孝不協因搆于武皇言存孝望風退衄無心擊賊恐有私盟也存孝知之自恃戰功鬱鬱不平因致書通王鎔又歸款于汴明年武皇自出井陘將逼真定存孝面見王鎔陳軍機武皇暴怒誅先獲汴將安康八方旋師七月復出師討存孝自縛馬關東下攻平山渡滹水擊鎮州四關城王鎔懼遣使乞平請以兵三萬助擊存孝許之

新唐書王

鎔失幽州助因乞盟進幣五十萬武皇蒐于樂城李存
歸糧二十萬請出兵助討存孝信屯琉璃陂九月存孝夜犯存信營奉誠軍使孫考老
被獲存信軍亂武皇進攻邢州深溝高壘以環之旋爲
存孝衝突溝塹不成有軍校袁奉韜者密令人謂存孝
曰大王俟塹成卽歸太原如塹壘未成恐無歸志尙書
所畏惟大王耳料諸將孰出尙書右王若西歸雖限以
黃河亦可浮渡況咫尺之洹安能阻尙書鋒銳哉存孝
然之縱兵成塹居旬日深溝高壘飛走不能及由是存
孝至敗城中食盡乾寧元年三月存孝登城首罪泣訴
于武皇曰兒蒙王深恩位至將帥苟非讒慝離間曷欲

捨父子之深恩附仇讎之黨兒雖褊狹設計實存信構
陷至此若得生見王面一言而死誠所甘心武皇愍之
遣劉太妃入城慰勞太妃引來謁見存孝泥首請罪曰
兒立微勞本無顯過但被人中傷申明無路迷昧至此
武皇叱之曰爾與王鎔書狀罪我萬端亦存信教耶繫
歸太原車裂于市然武皇深惜其才存孝每臨大敵被
重鎧橐弓坐稍僕人以二騎從陣中易騎輕捷如飛獨
舞鐵槌挺身陷陣萬人辟易蓋古張遼甘寧之比也存
孝死武皇不視事旬日私憾諸將久之
李存進振武人本姓孫名重進歐陽史太祖破朔州得
之賜以姓名養爲子

父佺世吏單于府重進初仕嵐州刺史湯羣爲部校獻
祖誅羣乃事武皇從入關還鎮太原署牙職景福中爲
義兒軍使賜姓名從討王行瑜以功授檢校常侍與李
嗣昭同破王珙于河中光化三年契丹犯塞寇雲中改
永州軍使鴈門以北都知兵馬使天復初破氏叔琮前
軍于洞渦三年授石州刺史莊宗初嗣位入爲步軍右
都檢校司空師出井陘授行營馬軍都虞候破汴軍于
柏鄉論功授邠州刺史轉檢校司徒俄兼西南面行營
招討使出師收慈州授慈沁二州刺史十二年定魏博
授天雄軍都巡按使時魏人初附有銀槍効節都強傑

難制專謀騷動存進沈厚果斷犯令者梟首尸于市諸
軍無不惕息靡然向風十四年擢蕃漢馬步副總管從
攻楊劉戰胡柳十六年以本職兼領振武節度使時王
師據德勝渡汴軍據楊村渡在上流汴人運洛陽竹木
造浮橋以濟軍王師以船渡緩急難濟存進率意欲造
浮橋軍吏曰河橋須竹竿大艚兩岸石倉鐵牛以爲固
今無竹石竊慮難成存進曰吾成算在心必有所立乃
課軍造葦竿維大艦數十艘作土山植巨木于岸以纜
之初軍中以爲戲月餘橋成制度條直人皆服其勤智
莊宗舉酒曰存進吾之杜預也賜寶馬御衣進檢校太

保兼魏博馬步都將與李存審圍德勝十九年汴將王
瓚率衆逼北城爲地穴火車百道進攻存進隨機拒應
或經日不得食汴軍退加檢校太傅王師討張文禮于
鎮州閻寶李嗣昭相次不利而歿七月存進代嗣昭爲
招討進營東垣渡夾滹沱爲壘沙土散惡垣壁難成存
進斬伐林樹版築旬日而就賊不能寇九月王處球盡
率其衆乘其無備奄至壘門存進聞之得部下數人出
鬪驅賊于橋下俄而賊大至後軍不繼血戰而歿時年
六十六同光時贈太尉存進行軍出師雖無奇跡然能
以法繩其驕放營壘守戰之備特推精力議者稱之有

子四人長曰漢韶

漢韶字享天幼有器局風儀峻整初事莊宗爲定安軍
使遷河東牢城指揮使時孟知祥權知太原軍府事會
契丹侵北鄙表令漢韶率師進討旣而大破契丹以功
加檢校右僕射同光中爲蔡州刺史天成初復姓孫氏
尋授彰國軍畱後累加檢校太保長興中爲洋州節度
使九國志閔帝嗣位加特進漢韶以其父名上表讓之
改檢校左僕射制曰改會稽之字抑有前聞換瓌寶
之文非末帝之起于鳳翔也漢韶與興元張虔釗各帥
部兵會王師于岐山下及西師俱叛漢韶逃歸本鎮聞
末帝卽位心不自安乃與張虔釗各舉其城送款于蜀

洎至成都孟知祥以漢韶故人尤善待之九國志漢韶與知祥敘汾
上舊事及洛中更變相對感泣知祥曰豐沛故人相遇于此何樂如之于是賜第宅金帛供帳什物悉官給之
 偽命永平軍節度使孟昶嗣偽位歷興元遂州兩鎮連帥累偽官至中書令封安樂郡王年七十餘卒于蜀
 李存璋字德璜雲中人武皇初起雲中存璋與康君立薛志勤等為奔走交從入關以功授國子祭酒累管萬勝雄威等軍從討李匡儔改義兒軍使光化二年授澤州刺史入為牢城使從李嗣昭討雲州叛將王暉平之改教練使檢校司空五年武皇疾篤召張承業與存璋授遺顧存璋爰立莊宗夷內難頗有力焉改河東馬步

都虞候兼領鹽鐵初武皇稍寵軍士藩部人多干擾鄜市肆其豪奪法司不能禁莊宗初嗣位銳于求理存璋得行其志抑強扶弱誅其豪首期月之間紀綱大振弭羣盜務耕稼去姦宄息倖門當時稱其材幹從破汴軍于夾城轉檢校司徒柏鄉之役為三鎮排陣使十一年從盟朱友謙于猗氏授汾州刺史汴將尹皓攻慈州逆戰敗之十三年王檀逼太原存璋率汾州之軍入城固守授大同防禦使應蔚朔等州都知兵馬使秋契丹陷蔚州安巴堅遣使馳木書求賂存璋斬其使契丹逼雲州存璋拒守城中有古鐵車乃鎔為兵仗以給軍士敵

退以功加檢校太傅大同軍節度使應蔚等州觀察使
十九年四月以疾卒于雲州府第同光初追贈太保平
章事晉天福初追贈太師有子三人彥球爲裨校戰歿
于鎮州十二年王豈誠大亂晉帝幸長州之軍人憐同
李存賢字子良本姓王名賢許州人祖啟忠父暉賢少
遇亂入黃巢軍武皇破賊陳許存賢來歸景福中典義
兒軍爲副兵馬使因賜姓名天祐三年從周德威赴援
上黨營于交口五年權知蔚州刺史以禦吐渾六年權
沁州刺史先是州當賊境不能保守乃于州南五十里
據險立柵爲治所已歷十餘年矣存賢至郡乃移復舊

郡剗闢荆棘特立廨舍州民完集莊宗嘉之轉檢校司
空真拜刺史九年汴人乘其無備來攻其城存賢擊退
之十一年授武州刺史山北團練使十二年移刺慈州
七月汴將尹皓攻州城存賢督軍拒戰汴軍攻擊百端
月餘遁去十八年河中朱友謙來求援命存賢師赴之
十九年汴將段凝軍五萬營臨晉蒲人大恐咸欲歸汴
或問于存賢曰河中將士欲拘公降于汴存賢曰吾奉
命河中死王事固其所也汴軍退以功加檢校司徒同
光初授右武衛上將軍十一月入覲洛陽二年三月幽
州李存審疾篤求入覲議擇帥代之方內宴莊宗曰吾

披榛故人零落殆盡所存者存審耳今復衰疾北門之事知付何人因目存賢曰無易于卿卽日授特進檢校太保充幽州盧龍節度使五月到鎮時契丹疆盛城門之外烽塵交警一日數戰存賢性忠謹周慎晝夜戒嚴不遑寢食以至憂勞成疾卒于幽州時年六十五詔贈太傅存賢少有材力善角觝初莊宗在藩邸每宴私與王郁角觝鬪勝郁頻不勝莊宗自矜其能謂存賢曰與爾一博如勝賞爾一郡卽時角觝存賢勝得蔚州刺史史臣曰昔武皇之起并汾也會鹿走于中原期龍戰于大澤蓄驍果之士以備鷹犬之用故自存信而下皆錫

姓以結其心授任以責其效與夫董卓之畜呂布亦何殊哉惟存孝之勇足以冠三軍而長萬夫苟不爲叛臣則可謂良將矣

舊五代史卷五十三

限河... 案

案... 案

舊五代史卷五十三攷證

唐列傳五李存信傳李存信本姓張案梁紀作張汚

落蓋本名汚落賜名存信

李存孝傳位至將帥案歐陽史作位至將相吳縝纂

誤云存孝本傳止為邢州留後未嘗為平章事何故

云位至將相耶

李存進傳父佺世吏單于案九國志孫漢韶傳云祖

昉嵐州刺史父存進振武軍節度使據是書存進父

名佺未嘗為刺史與九國志異

李存賢傳李存賢字子良本姓王名賢許州人祖啟忠

父暉案九國志李奉虔傳奉虔太原人本姓王氏
祖欽唐隰州刺史父存賢佐唐武皇累著功賜姓李
氏攷是書作許州人又作父暉不載其官爵與九國
志異

十八年河中朱友謙來求援 案吳縝纂誤據梁末帝
紀及莊宗本紀當作十七年

汴軍退 案歐陽史作擊走梁兵吳縝纂誤云朱友謙
符存審劉鄩傳載鄩討友謙存審救之而鄩敗其事
始末甚明無存賢擊走梁兵之事况大將自是存審
安得隱其姓而存賢獨有功乎今攷是書止作汴軍

退不言存賢擊退較歐陽史爲得其實

卽日授特進檢校太保充幽州盧龍節度使 案九國
志梁人攻上黨莊宗親總大軍以援之存賢先登陷
敵以功授盧龍軍節度使與是書異

存賢勝得蔚州刺史 案存賢爲蔚州刺史在天祐五
年蓋因角觝而得郡也歐陽史作與爾一鎮以爲盧
龍節度使與是書異

安巴堅舊作阿保機今改

舊五代史卷五十三攷證

舊五代史卷五十四

宋門下侍郎參知政事監修國史薛居正等撰

唐書第三十

列傳六

王鏐其先回鶻部人也遠祖沒諾干唐至德中事鎮州

節度使王武俊為騎將武俊嘉其勇幹畜為假子號王

五哥其後子孫以王為氏四代祖廷湊事鎮帥王承宗

為牙將長慶初承宗卒穆宗命田宏正為成德軍節度

使既而鎮人殺宏正推廷湊為留後朝廷不能制因以

旄鉞授之廷湊卒子元達尚文宗女壽安公主元達卒

子紹鼎立紹鼎卒子景崇立皆世襲鎮州節度使並前
史有傳景崇位至太尉中書令封常山王中和三年卒
鎔卽景崇之子也年十歲三軍推襲父位大順中武皇
將李存孝旣平邢洛因獻謀於武皇欲兼并鎮定乃連
年出師以擾鎮之屬邑鎔苦之遣使求救於幽州舊唐書云
時天子蒙塵九州鼎沸河東節度使李克用虎視山東
方謀吞據鎔以重賂結納請以修和好晉軍討孟方立
于邢州鎔常奉以芻糧及方立平晉自是燕帥李匡威
將李存孝侵鎔南部鎔求援于幽州
頻歲出軍以爲鎔援時匡威兵勢方盛以鎔沖弱將有
窺圖之志景福二年春匡威率精騎數萬再來赴援會
匡威弟匡儔奪據兗位匡威退無歸路鎔乃延入府第

館於寶壽佛寺鎔以匡威因已而失國又感其援助之
力事之如父五月鎔誦匡威于其館匡威陰遣部下伏
甲劫鎔抱持之鎔曰公戒部人勿造次吾國爲晉人所
侵垂將覆滅賴公濟援之力幸而獲存今日之事本所
甘心卽並轡歸府舍鎔軍拒之竟殺匡威鎔本踈瘦時
年始十七當與匡威並轡之時雷雨驟作屋瓦皆飛有
一人于缺垣中望見鎔鎔就之遽挾于馬上肩之而去
翼日鎔但覺項痛頭偏蓋因爲有力者所挾不勝其苦
故也旣而訪之則曰墨君和乃鼓刀之士也遂厚賞之
太平廣記引劉氏耳日記云真定墨君和幼名三旺眉
日稜岸肌膚若鐵年十五六趙王鎔初卽位曾見之悅

而問曰此中何得崑崙兒也問其姓與形質相應即呼
為墨崑崙因以皂衣賜之是時常山縣邑屢為并州中
軍所侵掠趙之將卒疲于戰敵告急于燕王李匡威率
師五萬來救之并人攻陷數城燕王聞之躬領五萬騎
徑與晉師戰于元氏晉師敗績趙王感燕王之德推牛
灑酒大犒于藁城輦金二十萬以謝之燕王歸國比及
境上為其弟匡儔所拒趙人以其有德于我遂營東圃
以居之燕王自以失國又見趙王之幼乃圖之遂伏甲
俟趙王且至即使擒之趙王請曰某承先代基構主此
山河每被鄰寇侵漁困于守備賴大王武略累挫戎鋒
獲保宗祧實資恩力顧惟幼懦夙有卑誠望不匆匆可
伸交讓願與大王同歸衙署即軍府必不拒違燕王以
為然遂與趙王並轡而進俄有大風并黑雲起于城上
大雨雷電至東角門內有勇夫袒臂旁來拳毆燕之介
士即挾負趙王踰垣而走遂得歸公府問其姓名君和
恐其難記但言曰硯中之物王心志之左右軍士既見
主免難遂逐燕王退走于東圃趙人圍而殺之趙
王名墨生以千金賞之兼賜上第一區良田萬畝仍恕
其十死奏授 鎔既失燕軍之援會武皇出師以逼真定
光祿大夫

鎔遣使謝罪出絹二十萬匹及具牛酒犒軍自是與鎔

俱修好如初泊梁祖兼有山東虎視天下鎔卑辭厚禮

以通和好新唐書羅紹威諷鎔絕太原光化三年秋梁

祖將吞河朔乃親征鎮定縱其軍燔鎮之關城鎔謂賓

佐曰事急矣謀其所向判官周式者有口辯出見梁祖

梁祖盛怒逆謂式曰王令公朋附并汾違盟爽信做賦

業已及此期于無捨式曰公為唐室之桓文當以禮義

而成霸業返欲窮兵黷武天下其謂公何新唐書李嗣

忠自將擊走之得鎔與嗣昭書全忠怒引軍攻鎔周式

請見全忠全忠即出書示式曰嗣昭在者宜速遣式曰

王公所與和者息人鋒鏑間耳况繼奉天子詔和解能

一番紙墜北路乎太原與趙本無恩嗣昭庸肯入耶

乾隆四十九年校刊

書

三

梁祖喜引式袂而慰之曰前言戲之耳卽送牛酒貨幣以犒軍式請鎔子昭祚及大將梁公儒李宏規子各一人往質于汴梁祖以女妻昭祚及梁祖稱帝鎔不得已行其正朔其後梁祖常慮河朔悠久難制會羅紹威卒因欲除移鎮定先遣親軍三千分據鎔深冀二郡以鎮守爲名又遣大將王景仁李思安率師七萬營于柏鄉鎔遣使告急莊宗莊宗命周德威率兵應之鎔復奉唐朝正朔稱天祐七年及破梁軍于高邑我軍大振自是遣大將王德明率三十七都從莊宗征伐收燕降魏皆預其功然鎔未嘗親軍遠出八年七月鎔至承天軍與

莊宗合宴同盟奉觴獻壽以申感槩莊宗以鎔父友曲加敬異爲之聲歌鎔亦報之謂莊宗爲四十六舅中飲莊宗抽佩刀斷衿爲盟許女妻鎔子昭誨因茲堅附于莊宗矣鎔自幼聰悟然仁而不武征伐出於下特以作藩數世專制四州高屏塵務不親軍政多以閹人秉權出納決斷悉聽所爲皆雕靡第舍崇飾園池植奇花異木遞相誇尚人士皆衰衣博帶高車大蓋以事嬉遊藩府之中當時爲盛鎔宴安旣久惑於左道專求長生之要常聚緇黃合鍊仙丹或講說佛經親受符籙西山多佛寺又有王母觀鎔增置館宇雕飾土木道士王若訥

者誘鎔登山臨水訪求仙迹每一出數月方歸百姓勞
弊王母觀石路既峻不通輿馬每登行命僕妾數十人
維錦繡牽持而上有闈人石希蒙者姦寵用事爲鎔所
嬖恆與之臥起天祐八年冬十二月鎔自西山迴宿於
鵲營莊將歸府第希蒙勸之他所宦者李宏規謂鎔曰
方今晉王親當矢石櫛沐風雨王殫供軍之租賦爲不
急之遊盤世道未夷人心多梗久虛府第遠出遊從如
樂禍之徒翻然起變拒門不納則王欲何歸鎔懼促歸
希蒙譖宏規專作威福多蓄猜防鎔由是復無歸志宏
規聞之怒使親事偏將蘇漢衡率兵擐甲遽至鎔前露

刃謂鎔曰軍人在外已久願從王歸宏規進曰石希蒙
說王遊從勞弊士庶又結構陰邪將爲大逆臣已偵視
情狀不虛請王殺之以除禍本鎔不聽宏規因令軍士
聚譟斬希蒙首抵于前鎔大恐遂歸是日令其子昭祚
與張文禮以兵圍李宏規及行軍司馬李藹宅並族誅
之誑誤者凡數十家又殺蘇漢衡收部下偏將下獄窮
其反狀親軍皆恐復不時給賜衆益懼文禮因其反側
密諭之曰王將坑爾曹宜自圖之衆皆掩泣相謂曰王
待我如是我等焉能効忠是夜親事軍十餘人自子城
西門尋垣而入鎔方焚香受籙軍士二人突入斷其首

袖之而出遂焚其府第煙燄亘天兵士大亂鎔姬妾數百皆赴水投火而死軍校有張友順者率軍人至張文禮之第請爲留後遂盡殺王氏之族鎔于昭宗朝賜號敦睦保定久大功臣位至成德軍節度使守太師中書令趙王梁祖加尚書令初鎔之遇害不獲其尸及莊宗攻下鎮州鎔之舊人于所焚府第灰間方得鎔之殘骸莊宗命幕客致祭葬于王氏故塋鎔長子昭祚亂之翼日張文禮索之斬于軍門次子昭誨當鎔被禍之夕昭誨爲軍人攜出府第置之地穴十餘日乃髡其髮被以僧衣屬湖南綱官李震南還軍士以昭誨託于震震置

之茶褚中旣至湖湘乃令依南嶽寺僧習業歲給其費昭誨年長思歸震卽齋送而還時鎔故將符習爲沐州節度使會昭誨來投卽表其事曰故趙王王鎔小男昭誨年十餘歲遇禍爲人所匿免今尚爲僧名崇隱謹令赴闕明宗賜衣一襲令脫僧服填之昭誨稱前成德軍中軍使檢校太傅詣中書陳狀特授朝議大夫檢校考功郎中司農少卿賜金紫符習因以女妻之其後累歷少列周顯德中遷少府監

王處直案王處直傳原本止存王都廢立之事而處直事闕佚今攷舊唐書列傳云處直字允明處存母弟也初爲定州後院軍都知兵馬使沐人入寇處存拒戰不利而退三軍大譟推處直爲帥乃權知留後事

汴將張存敬攻城梯衝雲合處直登城呼曰敝邑于朝
廷未嘗不忠于藩鄰未嘗失禮不虞君之涉吾地何也
朱溫使人報之曰何以附太原而弱鄰道處直報曰吾
兄與太原同時立勳王室地又親鄰修好往來常道也
請從此改圖溫許之仍歸罪于孔目吏梁問出絹十萬
匹牛酒以犒汴軍存敬修盟而退溫因表授旄鉞檢校
左僕射天祐元年加太保封太原王後仕僞梁授北平
王檢校太尉不數歲復歸于莊宗後十餘年爲其子都
廢歸私第尋卒年六十一

王都本姓劉小字雲郎中山陘邑人也初有妖人李應
之得于村落間養爲己子及處直有疾應之以左道醫
之不久病間處直神之待爲羽人始假幕職出入無間
漸署爲行軍司馬軍府之事咸取決焉處直時未有子
應之以都遺於處直曰此子生而有異因是都得爲處

直之子其後應之閻白丁于管內別置新軍起第於博
陵坊面開一門動皆鬼道處直信重日隆將校相慮變
在朝夕謀先事爲禍會燕師假道伏甲於外城以備不
虞昧旦入郭諸校因引軍以圍其第應之死於亂兵咸
云不見其尸衆不解甲乃逼牙帳請殺都處直堅靳之
久乃得免翼日賞勞籍其兵于臥內自隊長已上記于
別簿漸以他事孥戮迨二十年別簿之記略無孥遺都
旣成長總其兵柄姦詐巧佞生而知之處直愛養漸有
付託之意時處直諸子尚幼乃以都爲節度副大使王
郁者亦處直之孽子也

案以下天祐十八年十二月莊
有闕文

宗親征鎮州敗契丹于沙河明年正月乘勝追敵過定
州都馬前奉迎莊宗幸其府第曲宴都有愛女十餘歲
莊宗與之論婚許爲皇子繼岌之妻自是恩寵特異奏
請無不從同光三年莊宗幸鄴都都來朝覲畱宴旬日
錫賚鉅萬遷太尉侍中時周元豹見之日形若鯉魚難
免刀七及明宗嗣位加中書令然以其奪據父位心深
惡之初同光中祁易二州刺史都奏部下將校爲之不
進戶口租賦自贍本軍天成初仍舊旣而安重誨用事
稍以朝政釐之時契丹犯塞諸軍多屯幽易間大將往
來都陰爲之備屢廢迎送漸成猜間和昭訓爲都籌畫

曰主上新有四海其勢易離可圖自安之計會朱守殷
據汴州反鎮州節度使王建立與安重誨不協心懷怨
嫉都陰知之乃遣人說建立謀叛建立僞許之密以狀
聞都又與青徐岐潞梓五帥蠟書以離間之三年四月
制削都在身官爵遣宋州節度使王晏球率師討之都
急與王郁謀引契丹爲援洎王師攻城契丹將托諾率
驍騎萬人來援都與契丹合兵大戰于嘉山爲王師所
敗惟托諾以二千騎奔入定州都仗之守城呼爲諾王
屈身瀝懇冀其盡力孤壘周年亦甚有備諸校或思歸
嚮以其訪察嚴密殺人相繼人無宿謀故數構不就都

好聚圖書自常山始破梁國初平令人廣將金帛收市以得爲務不責貴賤書至三萬卷名畫樂器各數百皆四方之精妙者萃于其府四年三月晏球拔定州時都校馬讓能降于曲陽門都巷戰而敗奔馬歸于府第縱火焚之府庫妻孥一夕俱燼惟擒托諾并其男四人弟一人獻于行在李繼陶者莊宗初畧地河朔俘而得之收養于宮中故名曰得得天成初安重誨知其本末付段佗養之爲兒佗知其不稱許其就便王都素蓄異志潛取以歸呼爲莊宗太子及都叛遂僭其服裝時俾乘墉欲惑軍士人咸知其僞競詬辱之城陷晏球獲之拘

送于闕下行至邢州遣使戮焉

史臣曰王鎔據鎮冀以稱王治將數世處直分易定以爲帥亦旣重侯一則惑佞臣而覆其宗一則嬖孽子而失其國其故何哉蓋富貴斯久仁義不修目眩于妖妍耳惑於絲竹故不能防姦于未兆察禍于未萌相繼敗亾又誰咎也

山文編卷四

舊五代史卷五十四

舊五代史卷五十四攷證

唐列傳六王鎔傳紹鼎卒子景崇立

案新唐書藩鎮

傳紹鼎卒子幼未能事以元達次子紹懿為留後紹

懿卒乃復授紹鼎子景崇與是書異

自是燕帥李匡威頻歲出軍以為鎔援 案太平廣記

引劉氏耳日記趙王鎔方在幼冲而燕軍寇北鄙王

選將拒之有勇士陳力劉幹投刺軍門願以五百人

嘗寇翼日力卒於鋒刃之下幹唱凱而還據是書鎔

方以燕帥為援未嘗與燕軍戰疑耳日記傳聞之誤

館于寶壽佛寺

案歐陽史作館于梅子園

和昭訓爲都籌畫 和昭訓宋史趙上交傳作和少微
都又與青徐岐潞梓五帥蠟書以離間之 案通鑑作
青徐潞益梓五帥胡三省注云是時青帥霍彥威徐
帥房知溫潞帥毛璋益帥孟知祥梓帥董璋是書有
岐帥而無益帥與通鑑異歐陽史從是書
托諾舊作禿餒今改

舊五代史卷五十四攷證

舊五代史卷五十五

宋門下侍郎參知政事監修國史薛居正等撰

唐書第三十一

典公列傳七

康君立蔚州興唐人世爲邊豪乾符中爲雲州牙校事
防禦使段文楚時羣盜起河南天下將亂代北仍歲阻
饑諸部豪傑咸有嘯聚邀功之志會文楚稍削軍人儲
給戍兵咨怨君立與薛鐵山程懷信王行審李存璋等
謀曰段公懦人難與共事方今四方雲擾武威不振丈
夫不能于此時立功立事非人豪也吾等雖權係部衆

然以雄勁聞于時者莫若沙陁部復又李振武父子勇冠諸軍吾等合勢推之則代北之地旬月可定功名富貴事無不濟也君立等乃夜謁武皇言曰方今天下大亂天子付將臣以邊事歲偶饑荒便削儲給我等邊人焉能守死公家父子素以威惠及五部當共除虐帥以謝邊人孰敢異議者武皇曰明天子在上舉事當有朝典公等勿輕議予家尊遠在振武萬一相迫俟子稟命君立等曰事機已洩遲則變生曷俟千里咨稟衆因聚謀擁武皇比及雲州衆且萬人師營鬪雞臺城中械文禁以應武皇之軍旣收城推武皇爲大同軍防禦留後

衆狀以聞朝廷不悅詔徵兵來討俄而獻祖失振武武皇失雲州朝廷命招討使李鈞幽州李可舉加兵于武皇攻武皇于蔚州君立從擊可舉之師屢捷及獻祖入達靺君立保感義軍武皇授鴈門節度以君立爲左都押牙從入關逐黃孽收長安武皇還鎮太原授檢校工部尙書先鋒軍使文德初李罕之旣失河陽來歸於武皇且求援焉乃以君立充南面招討使李存孝副之師二萬助罕之攻取河陽三月與汴將丁會牛存節戰于沅河臨陣之次騎將安休休叛入汴軍君立引退八月授汾州刺史大順元年潞州小校安居受反武皇遣君

立討平之授檢校左僕射昭義節度使自武皇之師連
歲略地於邢洺攻孟方立君立常率澤潞之師以爲掎
角景福初檢校司徒食邑千戶二年李存孝據邢州叛
武皇命君立討之以功加檢校太保乾寧初存孝平班
師存孝旣死武皇深惜之怒諸將無解愠者初李存信
與存孝不協屢相傾奪而君立素與存信善九月君立
至太原武皇會諸將酒博因語及存孝事流涕不已時
君立以一言忤旨武皇賜酖而殂時年四十八明宗卽
位以念舊之故詔贈太傅

薛志勤蔚州奉誠人小字鐵山初爲獻祖帳中親信乾

符中與康君立共推武皇定雲州以功授右牙都校從
入達靼武皇授節鴈門志勤領代北軍使從入關收京
城以功授檢校工部尙書河東右都押牙先鋒右軍使
從武皇救陳許平黃巢武皇遇難於上源驛汴將楊彥
洪連車樹柵遮絕巷陌時騎從皆醉宴席旣闌汴軍四
面攻傳舍志勤虓勇冠絕復酒膽激壯因獨登驛樓大
呼曰朱僕射負恩無行邀我司空圖之吾三百人足以
濟事因彎弧發射矢無虛發汴人斃者數十志勤私謂
武皇曰事急矣如至五鼓吾屬無遺類矣可速行因扶
武皇而去雷雨暴猛汴人扼橋志勤以其屬血戰擊敗

之得侍武皇還營由是恩顧益厚大順初張濬以天子之師來侵太原十月大軍入陰地志勤與李承嗣率騎三千抗之敗韓建之軍于蒙坑進收晉絳以功授忻州刺史二年從討鎮州收天長臨城志勤皆先登陷陣勇敢無前王暉據雲州叛討平之以志勤爲大同軍防禦使檢校司空乾寧初代康君立爲昭義節度使光化元年十二月以疾卒於潞時年六十二

史建瑋字國寶父敬思鴈門人仕郡至牙校武皇節制鴈門敬思爲九府都督從入關定京師及鎮太原爲裨將中和四年從援陳許爲前鋒敗黃巢于汴上追賊至

徐堯常將騎挺身酣戰勇冠諸軍是時天下之師雲集軍中無不推伏六月衛從武皇入汴州舍于上源驛是夕爲汴人所攻敬思方大醉因蹶然而興操弓與汴人鬪矢不虛發汴人死者數百夜分冒雨方達汴橋左右扶武皇決圍而去敬思後拒血戰而歿武皇還營知失敬思流涕久之建瑋以父廕少仕軍門光化中典昭德軍與李嗣昭攻汾州率先登城擒叛將李瑋以獻授檢校工部尙書李思安之圍上黨也建瑋爲前鋒與總管周德威赴援時汴人夾城深固援路斷絕建瑋口引精騎設伏擒生夜犯汴營驅斬千計敵人不敢芻牧汴將

王景仁營於柏鄉建瑋與周德威先出井陘高邑之戰日已晡晚汴軍有歸志建瑋督部落精騎先陷其陣夾攻魏滑之間遂長驅追擊夜入柏鄉俘斬數千計論功加檢校左僕射師還留戍趙州汴將氏延賞數犯趙之南鄙建瑋設伏柏鄉獲延賞獻之九年梁祖親攻蓍縣時王師併攻幽州聲言汴軍五十萬將寇鎮定都將符存審謂建瑋曰梁軍儻以五十萬來我等何以待之裨將趙行實曰走入土門爲上策存審曰事未可知但老賊在東別將西來尙可徐圖不旬日楊師厚圍棗強賀德倫圍蓍縣梁祖自至攻城甚急存審曰吾王方事北

面南鄙之事付我等數人今西道無兵坐滋賊勢何以爲謀老賊若不下蓍阜必西攻深冀與公等料閱騎軍偵視賊勢乃選精騎八百趨信都存審扼下博橋建瑋與李嗣肱分道擒生建瑋乃分麾下三百騎爲五軍自將一軍深入各命俘掠梁軍之芻牧者還會下博橋翼日諸軍皆至獲芻牧者數百人聚而殺之緩數十人令其逸去各曰沙陁軍大至矣梁軍震恐明日建瑋嗣肱爲梁軍服色與芻牧者相雜晡晚及賀德倫寨門殺守門者縱火大譟斬俘而去是夜梁祖燒營而遁比至貝州迷失道路委棄兵仗不可勝計十二年魏博歸款建

瑋與符存審前軍屯魏縣十三年敗劉鄩於元城收澶
州以建瑋爲刺史檢校司空外衙騎軍都將尋歷貝相
二州刺史屯于德勝十八年與閻寶討張文禮爲馬軍
都將八月收趙州獲刺史王鋌進逼鎮州爲流矢所中
卒於軍時年四十六
李承嗣代州鴈門人父佐方承嗣少仕郡補右職中和
二年從武皇討賊關輔爲前鋒王師之攻華陰黃巢令
僞客省使王汀會軍機於黃揆承嗣擒之以獻賊平以
功授汾州司馬改榆次鎮將光啓初從討蔡賊于陳許
上源之難遣承嗣奉表行在陳訴其事觀軍容田令孜

館而慰諭令達情於武皇姑務協和仍授以左散騎常
侍朱玫之亂遣承嗣率軍萬人援鄜州至渭橋迎扈車
駕王行瑜旣殺朱玫承嗣會鄜夏之師入定京城獲僞
相裴徹鄭昌圖函送朱玫襄王首獻于行在駕還官賜
號迎鑿功臣檢校工部尙書守嵐州刺史賜犒軍錢二
萬貫時車駕初還三輔多盜承嗣按兵警禦輦轂又安
及還屯於鄜留別將馬嘉福五百騎宿衛孟方立之襲
遼州也武皇遣承嗣設伏于榆社以待之邢人旣至承
嗣發伏擊其歸兵大敗之獲其將奚忠信以功授洛州
刺史及張濬之加兵于太原也時鳳翔軍營霍邑承嗣

率一軍攻之岐人夜遁追擊至趙城合大軍攻平陽旬
有三日而拔師還改教練使檢校司徒乾寧二年竟鄆
為汴人所攻勢漸危蹙使乞師於武皇遣承嗣率三千
騎假道于魏渡河援之時李存信屯于莘縣既而羅宏
信背盟掩擊王師因茲隔絕及瑄瑾失守承嗣與朱瑾
史儼同入淮南承嗣史儼皆驍將也淮人得之軍聲大
振十國春秋吳列傳太祖武皇深惜之如失左右手乃
署為淮南行軍副使遣趙岳間道使於淮南請歸承嗣等楊行密許之遣使
陳令存修好于武皇其年九月汴將龐師古葛從周出
師將收淮南朱瑾率淮南軍三萬與承嗣設伏於清口

大敗汴人庄獲龐師古行密嘉其雄才留而不遣仍奏
授檢校太尉領鎮海軍節度使天祐九年淮人聞莊宗
有柏鄉之捷乃以承嗣為楚州節度使以張犄角十七
年七月卒於楚州時年五十五

史儼代州鴈門人以便騎射給事於武皇為帳中親將
驍果絕眾善擒生設伏望塵揣敵所向皆捷自武皇入
定三輔誅黃巢每出師皆從乾寧中從討王行瑜師次
渭北遣儼率五百騎護駕石門時京城大擾士庶奔逃
散布南山儼分騎警衛比駕還京盜賊不作以功授檢
校右散騎常侍屯於三橋者累月昭宗寵錫優異明年

與李承嗣率騎渡河援兗鄆時汴軍雄盛自青徐兗鄆
柵壘相望儼與騎將安福順等每以數千騎直犯營壘
左俘右斬汴軍為之披靡及朱瑾失守與李承嗣等奔
淮南淮人比善水軍不閑騎射既得儼等軍聲大振尋
挫汴軍于清口其後併鍾傳擒杜洪削錢鏐成行密之
霸迹者皆儼與承嗣之力也淮人館遇甚厚妻孥第舍
必推其甲故儼等盡其死力十國春秋云儼累官滁州刺史天祐十三
年卒於廣陵
蓋寓蔚州人祖祚父慶世為州之牙將武皇起雲中寓
與康君立等推轂佐佑之因為腹心武皇節制鴈門署

職為都押牙領嵐州刺史泊移鎮太原改左都押牙檢

校左僕射武皇與之決事言無不從凡出征行靡不衛

從通鑑光啓二年駕幸興元大將蓋寓說克用曰鑾輿

播遷天下皆歸咎于我今不誅朱玫黜李愷無以自

湔洗克用從之又通鑑攷異引紀年錄云偽使至太原

太祖詰其事狀曰皆朱玫所為將斬之以徇大將蓋寓

等言云太祖燔偽詔械其使馳檄諭諸鎮曰今月二

十日得襄王偽詔及朱玫文字云田令孜脅遷鑾駕播

越梁洋行至半途六軍變擾遂至蒼皇而晏駕不知弒

逆者何人永念丕基不可無主昨四鎮藩后推朕纂承
已于正殿受冊畢改元大赦者李愷出自贅疣名汙藩
邸智昏菽麥識昧機權李符擄之以塞辭朱玫賣之以
為利呂不韋之奇貨可見姦邪蕭世誠之士囊期于匪
夕近者當道徑差健步奉表起居行朝現駐巴梁宿衛
比無騷動而朱玫脅其孤駭自號台衡敢首
亂階明言晏駕熒惑藩鎮凌弱廟朝云云
乾寧二年
從入關討王行瑜特授檢校太保開國侯食邑一千戶

領容管觀察經畧使光化初車駕還京授檢校太傅封
成陽郡公寓性通黠多智數善揣人主情武皇性嚴急
左右難事無委遇者小有違忤卽寘于法惟寓承顏希
旨規其趨向婉辭順意以盡參裨武皇或暴怒將吏事
將不測寓欲救止必佯佐其怒以責之武皇怡然釋之
有所諫諍必徵近事以爲喻自武皇鎮撫太原最推親
信中外將吏無不景附朝廷藩鄰信使結託先及武皇
次入寓門旣總軍中大柄其名震主梁祖亦使姦人離
間暴揚於天下言蓋寓已代李聞者寒心武皇畧無疑
間初武皇旣平王行瑜還師渭北暴雨六十日諸將或

請入覲且云天顏咫尺安得不行覲禮武皇意未決寓
白日車駕自石門還京寢未安席比爲行瑜兄弟驚駭
乘輿今京師未寧姦宄流議大王移兵渡渭必恐復動
宸情君臣始終不必朝覲但歸藩守姑務勤王是忠臣
之道也武皇笑曰蓋寓尙阻吾入覲況天下人哉卽日
班師天祐二年三月寓病篤武皇日幸其第手賜藥餌
初寓家每事珍膳窮極海陸精于府饌武皇非寓家所
獻不食每幸寓第其往如歸恩寵之洽時無與比及其
卒也哭之彌慟莊宗卽位追贈太師

伊廣字言

原本闕一字

元和中右僕射慎之後廣中和末除

授忻州刺史遇天下大亂乃委質于武皇廣襟情灑落善占對累歷右職授汾州刺史時武皇主盟諸侯景附軍機締結聘遣旁午廣奉使稱旨累遷至檢校司徒乾寧四年從征劉仁恭武皇之師不利于成安寨廣歿于賊有女爲莊宗淑妃子承俊歷貝遼二州刺史李承勳者與廣同爲牙將善于奉使名聞軍中承勳累遷至太原少尹劉守光之僭號也莊宗遣承勳往使問其釁端承勳至幽州見守光如藩方聘問之禮謁者曰燕王爲帝矣可行朝禮承勳曰吾大國使人太原亞尹是唐帝除授燕主自可臣其部人安可臣我哉守光聞

之不悅拘留于獄數日而出詰之曰臣我乎承勳曰燕君能臣我王則我臣之吾有死而已安敢辱命會王師討守光承勳竟歿於燕

史敬鎔太原人事武皇爲帳中紀綱甚親任之莊宗初嗣晉王位李克寧陰構異圖將害莊宗事發有日矣克寧密引敬鎔以邪謀諭之旣而敬鎔白貞簡太后惶駭召張承業李存璋等圖之克寧等伏誅以功累歷郡同光初爲華州節度使移鎮安州天成中入爲金吾上將軍基年復授鄧州至鎮數月卒贈太尉

軍養卒對對復使至趙煥且卒餽太保

光祿卿華嚴請更對煥使使天奴中人為金吾士

谷憲承業李容章等圖之京寧等為若以世果烈

寧密臣趙煥以保精簡之拜而趙煥曰貞簡太司對

國晉王立李京寧劍舞異國殊書孫宗事發齊日矣京

與趙煥太烈人事九日為中中臨甚賤士之孫宗

情若此承情竟效

晉趙煥王限非臣之吾自取而日安煥氣命會王

舊五代史卷五十五曰而山讀之曰臣承平承博曰燕

舊五代史卷五十五攷證

唐列傳七康君立傳君立等乃夜謁武皇 案通鑑攷

異引趙鳳紀年錄云邊校程懷信康君立等十餘帳

日譁於太祖之門疑非事實新唐書作夜謁克用通

鑑作潛詣蔚州說克用皆以是書為據

武皇賜酖而殂 案通鑑攷異引唐遺錄以君立為杖

死與是書異

史建瑋傳建瑋乃分麾下三百騎為五軍 案歐陽史

史作建瑋分其麾下五百騎為五隊是書作三百騎史

異文也

時年四十六 案歐陽史作四十二

史儼傳儼與騎將安福順等每以數千騎直犯營壘

案史儼援兗鄆在乾寧二年冬是書梁太祖紀正月

擒蕃將安福順然則安福順不當與史儼同行疑傳

文有訛字

疑於晉書魏書

日

吳

案歐陽史

舊五代史卷五十五攷證

